



Uorden disciplinar

Sebasond sin artechel 55 dalla lescha da scola cantunala dils 02-03-2012, sin artechel 54 dall'ordinaziun tier la lescha da scola, sco era sin artechel 14^{2.16} dalla lescha da scola dalla vischernaunca da Mustér dils 27-02-2015, relai il cussegli da scola dalla vischernaunca da Mustér suandont uorden disciplinar:

Art. 1 Intent

Ensemens cun la lescha da scola duei igl uorden disciplinar gidar da contonscher in menaschi da scola che lubescha da luvrar, scolar e sescolar a moda efficienta ed emperneivla.

Art. 2 Valeivladad

Igl uorden disciplinar vala per tut las scolaras e tut ils scolars dalla scola dalla vischernaunca da Mustér.

Art. 3 Reglas da secuntener

¹Ils scolars secuntegnan a moda discreta e toleranta e tralain remarcas offendentas. Ils scolars sedeportan andantamein denter els, enviers scolasts, autoritads da scola e personal da scola.

² Las directivas dils scolasts, dallas autoritads da scola, dil personal da scola e dils manischunz dils bus da scola ein d'observar.

³ Ils scolars duein evitar tut quei che disturba il menaschi da scola.

⁴ Senza lubentscha dils scolasts eis ei buca lubiu als scolars da bandunar il plaz scola enteifer il temps da scola.

⁵ Il temps da scola ei d'observar strictamein.

Art. 4 Localitads, indrezs, urdeins

¹ En tuts baghetgs da scola dueigien ils scolars sedepurtar bein ed haver quita dils indrezs en las localitads e sils areals da scola, sco era dils urdeins e dil material da scola.

² Las reglas dalla casa ein d'observar.

Art. 5 Viadi a scola

Per il viadi a scola han ils geniturs (ni la persuna responsabla per l'educaziun) la responsablidad e l'obligaziun da survigilonza.



L'excepziun ein ils transports organisai dalla scola.

Art. 6 Products da consum e tassis enivronts

Sigl areal da scola ed a caschun dad occurrentzas da scola ein mieds che donnegieschan la sanadad sco fimar, il consum da bibrondas alcoholicas e drogas scumandau strictamein als scolars.

Art. 7 Violenza

Sigl areal da scola ed a caschun d'occurrentzas da scola vegn tolerau negina violenza, ni fisica ni psichica.

Art. 8 Puniziuns disciplinaras

¹ Surpassaments enviers igl uorden disciplinar vegnan puni cun reprimandas, lavurs da castitg, arrest ni cun lavur speciala sut survigilonza.

² Il cuoz maximal pigl arrest e per las lavurs specialas mutta a 6 mezs dis per cass.

Art. 9 Cumpetenzas

¹ Il scolast da classa sa ordinar ina reprimanda a bucca ni a scret, lavurs da castitg ed arrest entochen in miez di per cass.

² Il menader da scola sa ordinar ina reprimanda a bucca ni a scret, lavurs da castitg ed arrest entochen in di per cass.

³ Il cussegli da scola sa ordinar tut las puniziuns disciplinaras.

Art. 10 Udida da dretg

¹ Specia e circumstanzia dil surpassament disciplinar ein da sclarir. Il scolar ei da tedlar.

² En cass nua ch'in arrest survarga in miez di ni nua che ina lavur speciala sut survigilonza stat en damonda, eis ei da tedlar ils geniturs respectivamein lur representants avon che prender ina decisiun. La decisiun ei da comunicar ad els a scret cun aschuntar ils motivs.

Art. 11 Recuors

¹ Encunter decisiuns da castitgs disciplinars tras il scolast ni il menader da scola sa vegnir fatg recuors al cussegli da scola enteifer 10 dis dapi la communicaziun. Quel decida definitivamein.



² Encunter decisiuns ch'il cussegli da scola pren sco emprema instanza sa vegnir fatg recuors al departement d'educaziun enteifer 10 dis.

Art. 12 Informaziun

Davart cass disciplinars informeschan las persunas d'instrucziun, il menader da scola e las autoritads responsablas ina l'autra commensuradamein cun risguardar l'obligaziun da discreziun.

Art. 13 Execuziun

Las persunas d'instrucziun, il menader da scola ed il cussegli da scola ein mintgamai responsabels per l'execuziun dils castitgs ch'els han ordinau. L'execuziun sa era vegnir delegada a persunas d'instrucziun ed ad outras persunas ni instanzas.

Art. 14 Vigur

Quei uorden disciplinar entra en vigur cun l'entschatta digl onn da scola 2015/2016. El remplazza igl uorden disciplinar dils 07-02-2002.

Approbau dil cussegli da scola, ils 20-11-2014

Il president:

Simon Bergamin

Il meinascola:

Kai Hinrichsen